


八指頭陀詩續集

卷一至卷五

第三本

PL
2771
.A6
v.3



Digitized by the Internet Archive
in 2010 with funding from
York University Libraries

2771
.A6
v.3

八
指
頭
陀
詩
續
集

楊
度
題


YORK UNIVERSITY

MAY 15 2001

EAST ASIAN STUDIES

己未仲冬月刊
於北京法源寺

八指頭陀詩續集卷一



釋敬安寄禪

牧牛偈示沙彌蓮舫

己亥

觀心如牧牛要將鼻孔穿芒繩在我手收放得自專勿
令犯苗稼時時痛著鞭劣性既已馴乃可樹下眠人牛
兩忘迹草色空芊芊努力策前修光陰勿虛捐

感事偶作

本來行脚慣何用乞心安石亂泉常咽風高雲更寒徒
吟五字穩欲息一枝難萬化歸真定從他變鼠肝

自笑

寒巖枯木一頭陀結習無如文字何自笑強書塵世字
却嗔倉頡誤人多

割肉燃燈供佛勞了知身是水中泡祇今十指惟餘八

余曾於阿育王寺燒二

指並剗脊肉燃燈供佛似學天龍吃兩刀

昔俱胝得天龍一指禪後

嘗豎指示人其供童效之爲俱胝所知召而問曰吾聞汝會佛法是否童云是遂問如何是佛法大意童豎一指俱胝亟以刀削之再問仍豎見指斷血流遂大悟

三月上已後六日曾公子詠周招道俗八人雅集

浩園限韻賦詩憶前年此會至者爲易遯叟俞

壽臣陳師曾陳戴白鄭湛侯及其子叔獻與余

共七人今遯叟棲廬山湛侯宰甯鄉叔獻死京

師師曾返章門預茲會者惟予與戴白壽臣而
已

龍城公子詩中史萬有羅胸富神理不妨玉樹雜蒹葭
高閣春風淡相倚名園桃李參差香詩壇獨步何堂堂
擊鉢聯吟興未已新篇擲地聲鏗鏘郊寒島瘦何足道
鳳舞龍翔得名早尼山鷺巔共遨遊理窟禪宗等深造
座中諸子皆英豪其間舊雨間新交因憶前年同此會
風流雲散蒼天高支公

逖叟自言爲
支公後身

已入廬山去迢遞

關河隔煙霧九疊屏風夢裏青何時却共東林住薄宦
猶憐老鄭虔西河有淚徒如泉陳蕃亦返章門棹三月

煙花空自鬧歡娛曾歷幾何時不堪舊苑今重到彈指
春光又一年忽驚鬚鬢已蒼然感君意氣還如昨煮葵
燒筍重開筵清議豪情自殊衆文殊亦受維摩供漫將
禪悅答檀施強作伽陀酬雅頌明朝歸卧衡山雲寒巖
煨芋與誰分鄴侯不作昌黎死眼中之人望吾子

贈朱蕤卿太守次卽席崑崙原韻

何年仙客下崑崙欲把西江一口吞金粟前身應已悟
玉堂舊事好重論偶窺龍藏尋禪話曾讀羊碑拭淚痕
政事文章在人口不勞吃吃老僧言

贈哭庵觀察疊前韻

多生積骨等崑崙淚點都歸恨海吞別有傷心惟自哭
難將此意向人論東西南北魂無語富貴功名夢有痕
山水情濃恩怨淡

用公語

英雄本色是真言

感懷二首三四疊韻

休誇大海與崑崙彌勒能將巨口吞十世古今俱是幻
孤雲懷抱向誰論等觀佛祖袋中屑淨拭河山鏡上痕
不二法門親證入拈花一笑更無言

神游吾亦到崑崙日月雙丸近可吞蹈海求仙徒自困
生天成佛豈虛論寒巖枯木孤禪意流水桃花舊淚痕
老我津梁了無濟聊持半偈息羣言

入指夏四言續集卷一
三
懷黃孟樂大令江南

聽斷蓮花漏滴聲
曉鐘殘月不勝情
瀟湘水與秦淮水
併作離愁繞石城

贈葉吏部五疊韻

高懷直欲小崑崙
雲夢胸中八九吞
獨抱孤忠憂晚事
力排邪說吐清論
愁聞電堠傳邊警
忍見銅人泣露痕
厓火然薪時已至
治安徒有賈生言

六月朔夢至一山林
壑幽秀絕似剡中
覺而賦此
山翠濃如潑
憑虛排萬峯
川原迷遠近
巖壑見孤雄
虎吼將崩石
雲扶欲倒松
溪行正幽絕
何處一聲鐘

答李佛翼公孫六疊韻

衡山突兀卽崑崙萬古雲霞自吐吞
芋火巖高香尙在石頭路滑道誰論
禪宗燈續馬師派神禹碑留鳥篆痕
七二峯巒青在眼把筇指點爲君言

重贈實公並題其崑崙集七疊韻

詞峯峻極矗崑崙五色牟尼互吐吞
名士風流俱絕調

仙童狡猾莫輕論

仙童狡猾乃湘綺先生戲實公語也

篋中諫草都成血

衣上天花不著痕君父恩深難報答
焚香長白世尊言

八疊韻送實公入都

何人更解唱崑崙別淚臨岐各暗吞
出岫無心雲自懶

方指臨南詩集卷一
五
冲霄有志鶴同論好憑造化回旋力重補山河破碎痕
我已辭家猶憫世公勤王事復何言

九疊韻贈葵園先生

巍然魯殿重崑崙學到河汾萬派吞自註六經傳正脈
獨持高議息羣論東山絲竹陶情緒北極星辰繞夢痕
知念時艱心更苦白頭猶復闡微言

十疊韻述懷並呈葵園先生

兩輪日月繞崑崙欲被脩羅取次吞世出世間俱有累
人非人等不須論牟尼寶殿含愁影帝釋花冠現萎痕
莫遣狂龍更流毒大鵬忍負負天言

十一疊韻呈葉吏部

平生積謗聳崑崙
誓捨殘軀肆虎吞
助我能脩忍辱行
畏人不作絕交論
半肩行李孤雲影
一領袈裟萬淚痕
讚毀從來沒嗔喜
曰魔曰佛任公言

十二疊韻呈笠雲本師

法門望重比崑崙
法海波瀾滿腹吞
自掃白雲遲客至
不將丹訣與人論
心香一瓣爐無燄
面壁多年石有痕
我學神光思斷臂
門庭立雪乞師言

漫興和江右謝渭巖韻

須彌頂上踏雲霞
俯視支那祇一華
碧海青天鵬作屋

蘆花秋水鴈爲家人民何異生風蟻歲月真如掣電蛇
古往今來皆夢幻誰從火宅問三車

秋懷

西風吹淚上袈裟兩鬢蕭蕭感歲華老去一身渾似葉
愁來四海總無家遠公社裏蓮將落陶令籬邊菊未花
欲白空王先痛哭可憐歷劫已恒沙

感懷呈蔡伯浩觀察

蕭然瓶鉢欲何鄉垂老天涯鬢已霜出世尙爲人所忌
浮名終與道相妨秋江水落魚龍遠野寺雲生狐鼠藏
一掬西風知己淚焦桐猶遇蔡中郎

贈按察使湍公八韻

湍公有道骨五欲不能醺秉節辭丹陛分曹憶白雲

公舊

官刑部

燕人思舊德楚老頌新芬霜落柏臺淨風清柰苑

聞和羹期十載煨芋好重分待畫麒麟閣相隨鸞鳳羣

元根知己固案牘莫言紛他日西山頂丹成駐夕暉

公喜

談丹訣

中秋夜偶作

太虛雲淨欲三更趺坐繩床萬慮清丹桂著花寒有影
碧梧含露靜無聲世途漸已崎嶇過吾道多因患難成
難得今宵好圓月照人偏向定中明

贈陳六笙觀察

并序

公官浙久歷任杭台諸郡由杭嘉湖道遷湖南
岳常澧道旋權衡永道己亥夏權鹽巡道署側
萬福禪林爲公供養香火處延余主席感賦六
絕以贈

錢塘江上射潮來多少魚龍勢盡摧怪底詩中有雲氣
曾扶拄杖到天台

湖海元龍意氣豪眼中甯有霍嫖姚剔鬚投幘真奇士

何止淵明懶折腰

剔鬚公在蔣
果敏營時事

南來爭識老人星三載清風滿洞庭應笑神仙祇耽酒

岳陽樓上幾時醒

偶移使節駐長沙老去逢秋興倍賒料得公餘無箇事
一簾疎雨詠黃花

欲將妙筆比羲之鐵畫銀鈎老益奇北海無人魯公死

浯溪嶽麓要新碑

公曾書劃山二字方廣丈餘刻於浯溪崖壁

衡嶽高高凌紫氛鄴侯遺澤尙流芬
懶殘爲感平生遇替守青山與白雲

憶天台茅屋二首

昔年台嶽三間屋置向千巖萬樹尖
華頂平鋪雲作海

石梁橫截水爲簾

一作閉戶却看雲在牖掛簷祇用水爲簾

多栽紅芋仍充

北窗詩集卷一
飯淡煑黃蘗不著鹽回憶山中無曆日看梅花卜歲將
淹

壞衲蒙頭夏不溫萬峯寒翠冷神魂老猿去摘霜晨果
餓虎來窺雪夜門袖底白生知海氣眉端青壓是天痕
赤城合眼時仍見笑把朱霞帶日吞

憶南嶽烟霞峯舊居

懶攜瓶鉢走天涯嶽頂還思著我家沙罐夜煨紅米飯
竹籃春摘白芽茶倦眠一石雲爲枕冷入千林雪作花
何事人間頻乞食此心已是負煙霞

過湘陰屈子祠

湖上微霜踏葉過荒祠
寥落倚巖阿湘娥隔浦啼秋竹
山鬼迷煙帶女蘿異代惟留騷客恨
獨清其奈濁流何
當年不作懷沙賦終古無人弔汨羅

秋夜寄懷周笠樵舍人用見懷原韻

龍宮鐘梵暮飄蕭耿耿秋懷鬱不消
籬下香憐黃菊瘦
意中人共白雲遙禪心朗印千潭月
詩思寒生一葉蕉
準擬明春來問訊高吟同送百花朝

宿萬壽寺曉登雲麓宮望城中一首

理筏涉風濤杖策度林樾
楓壑流遠丹桂嶺明秋潔暝
投精舍宿禪誦猶未歇
高松墜寒籟深澗貯涼月
寂照

兩俱融根塵忽超越晨鐘從定起幽途冒煙發
浥露躋山椒憑虛俯城闕邈矣衡嶽雲皎然湘流雪
至理匪言詮泠泠契禪說

十三疊韻贈陳默廬觀察

庚子

元龍豪氣撼崑崙收取黃河當酒吞世事且隨雲共幻
此心宜與月同論西湖夢覺黃鸝語南浦春回碧草痕
他日寒巖煨芋熟可能來踐嬾殘言

十四疊韻與默廬論道

掀翻大海倒崑崙魔佛齊教一口吞是聖是凡名強立
非無非有意難論欲參最上真如諦淨掃虛空粉碎痕

妙意微茫須自悟
豐干饒舌豈能言

戲答沈炯甫

從他腰繫紫金魚
似我山居恐未如
鳥解啣花猿獻果
虎能守戶鶴傳書
定中流水自清冷
身外浮雲任卷舒
欲把禪心印明月
池邊種樹不妨疎

示僧可

平生所寶爍迦心
不貴人施佈地金
幽谷有蘭都作草
懶雲入岫豈爲霖
惟愁食量隨年減
且喜吟髭逐日深
蓮社交遊多礙道
欲偕惠永住西林

蔡仲岐廉訪自江右寄示寓真軒詩鈔及放游錄

題此奉贈

蔡公曠達世罕儔
罷官還作名山遊
直浮洞庭下鄂渚
欲攜黃鶴隨白鷗
匡山攀斗興更發
忽放扁舟入吳越
錢湖禹穴恣冥搜
鴈蕩天台詫奇絕
迢遙渡海謁神京
爲愛西山爽氣清
重瞻鳳闕應垂涕
誰念孤臣去國情
倦游且返西江棹
世外烟霞從所好
不因謫宦遺塵纓
聖地靈區幾時到
嗟予禪寂廢幽尋
孤負蒼茫雲水心
何當一宿東林寺
共聽蓮花曉漏音

憶四明山水四首

並記

天童山距甯郡六十里四明志載晉時義興禪

師結茅於茲感太白星化爲童子給侍薪水故
名天童又名太白宋王荊公及明人皆有詩山
有宏法寺舊稱玲瓏以寺西玲瓏巖得名陸游
有游玲瓏巖詩余於癸未春習定巖中一夕步
月歸寺見蛇於池蟠聳如塔忽虎聲嘯林雷雨
交作溪水陡湧數尺詢老宿云山中數十百年
龍虎必鬥鬥則海上兵起未幾法人入寇

四明山好是天童我昔誅茅住此中二十里松青夾道
萬千竿竹綠浮空長蛇盤澗水湧塔老虎嘯谷林生風
願逐白雲還絕巘頻年棲定碧玲瓏

阿育王山與天童並峙爲四明佛地按阿育王傳
王於釋迦佛涅槃百年後始生爲鐵輪王有神
力碎七寶爲末和以香泥於一夜造八萬四千
塔每塔置舍利一顆請耶舍尊者放光八萬四
千道勅諸鬼神於閻浮提選六殊勝境八吉祥
地乃安一塔中國舍利塔古十九處阿育王山
所藏其一也山有放光松以宋時舍利於松上
放光故名太宗聞舍利靈異迎入大內初以火
燒鍊色愈光旣使力士以金剛椎擊之無損痕
而椎破矣舍利光燭宮殿因額塔曰最勝光明

之塔殿爲吉祥殊勝之殿蓋舍利卽華言堅固人能三十年固精不搖則遍體皆生舍利但無光若佛舍利乃神應無方耳

青山如鳳欲迴翔勝境天開八吉祥舍利有光爭日月浮圖無語閱滄桑長松偃蹇蛟龍卧古殿陰森神鬼藏我有茅庵臨絕頂白雲應爲護禪床

雪竇山在甯波奉化縣山水爲浙東第一資聖寺當山椒寺前諸溪匯積出奔於千丈巖巖腰一石竇激水騰起散爲飛雪故名雪竇千丈巖與徐鳧巖瀑皆數千丈而上中下三隱潭之瀑比

之天台石梁爲尤奇下潭側突立石笋數千仞
苔花繡錯如優波毬多入定天魔以纓絡繫其
頸循石上爲妙高臺俯視天台四明出沒雲際
如拱如揖昔宋高宗夢至一山臨海上巖壑幽
邃覺而異之詢羣臣知爲雪竇乃書應夢名山
四字榜之今石刻尙存

昔年取道入天台曾打溪橋越嶺來瀑布晴飛千澗雪
洪鐘曉動萬山雷青松有約長偕隱白髮無情老更催
却憶龍潭秋夜月夢魂時繞妙高臺

普陀山在大海中去定海三十里寒暖適宜草木

青蔚山多蛇性馴無毒論者謂大士所感又世
稱紫竹林者在此是間無竹惟石色紺紫紋若
黑竹然因以是得名環山皆精蘭梵刹鐘磬鏗
然當夫海淨空澄登佛頂峯望之恍置身琉璃
界上幾不知有人間世也梵音洞乃大士現像
處四衆睹者不同吾湘郭意城先生來此瞻禮
摩隨心現像四字於壁

昔余浮波入大荒一葉與之相低昂黑風險墮羅刹國
白日愁渡蓮花洋舟人忽云彼岸到估客爭爇旃檀香
法筵清淨未曾有海水盡放琉璃光

寄題蓮峯方廣寺並東寶上人

踏徧衡山翠萬重舊遊吾最憶蓮峯潭光陰黝龍藏毒
草色深青鹿養茸野徑斜陽穿壞塔寺門蒼雪墜寒松
別來徒有煙霞夢塵海茫茫負此胸

陳六笙觀察寫其像爲老比丘說法狀以六美環
侍其側題曰六賊戲彌陀蓋取楞嚴六根爲賊
之義因說四偈奉讚

茫茫宦海浪掀騰此老蕭閒似野僧身未出家心已淨
故將禪悅寫溪藤

何來六賊戲彌陀都是心中自起魔迷則六根成六賊

悟時六賊六波羅

欲界凡夫祇醉迷深山愁煞老闍黎牟尼在握人誰識
顚顚能清濁水泥

維摩詰是箇中人天女何妨繞定身打破色空關
楔子
髑髏頭上野花春

挽朱萼生觀察二首

並序

歲乙酉於黃容瑞孝廉處見君相與談越中山
水甚樂屢約爲棠坡之遊不果後數年又遇於
衡州雁峯寺自此遂不復面矣嗟嗟浮雲一別
泡影三生追憶曩游不勝悽惻因爲挽詩二章

以志蓮社之交云爾

昔時黃大令見我總論文高視無餘子清談每及君如
何林下約空望嶺頭雲四月湘山路鶯啼不可聞
衡州一爲別忽忽十年餘摩詰常多病稽康罕寄書因
悲哲人往轉覺故交疎寂寞蓮花社誰過惠遠廬

題朱孝廉夏灣別墅一首

並序

予與景喬孝廉別三年矣庚子夏五以事至棠
坡得重晤話舊極歡明日速予過談適章癡生
茂才館其家章固風雅士一見如故論詩之暇
相與嘲謔雖東坡佛印不是過也景喬稔知予

性饕餮每食必勸加予以連日言食頗倦偶假
寐却餐景喬詫甚偕章戲曰師不食得毋以園
蔬味薄耶晚間當供水梭花且曰此物食水草
性潔非葷捨師五臟廟中與黃齏白粥同叅禪
悅師當納受予吃吃難辨詩以答之

故人命筍輿速我至山居一笑成佳會清言論道書微
涼生砌竹細雨摘園蔬卽此有真味何須勸食魚

初伏日題宿雲律師禪房二首

碧梧葉淨自生涼三兩幽禽語夕陽閒捲疎簾坐微雨
藕花風透衲衣香

尊者慈心伏虎蛇閉門常誦妙蓮華鉢中留食知師意
應念庭槐有乳鴉

王子鴻參軍自衡郡養疴還省贈詩一首

參軍亦吏隱長歌遺塵纓閒居謝物役以病固其精昨
經衡嶽歸夢中山猶青念彼噉名客擾擾神無甯石火
爭微燄幽谷競虛聲豈知曠士懷不爲好爵縈高結黃
鶴契冷尋白鷗盟伊余美元度時與論金經有我卽爲
患况復有吾形淨理雖自契心月徒孤明終期妙善圓
一悟證無生

題龍萸溪明府眠琴綠陰小影

池邊雙柳樹綠色已成陰時有好靜者於茲調素琴憑
君流水意寫我出塵心不悟鏡中影誰知絃外音

重晤陸桂亭明府

並序

辛巳冬余挂錫明州阿育王山寺公與兄桂山
茂才見訪於秋水山房誦余水清魚嚼月山靜
鳥眠雲之句極加歎賞乃偕觀金沙井玉几峯
諸勝公所居寶幢市距寺僅二里許時相過從
明年秋余因事至杭州適鄉闈揭曉公兄中式
然已於榜前謝世矣識與不識皆痛惜之時壬
午九月也越二年余還湘與公不通音問者二

十年去歲有僧自明州歸詢公近狀始知公於
數年前以進士授吾湘新田縣尹今秋公調簾
回省聞信走謁若昧生平語及舊游始得恍悟
遂相與泫然感賦此詩

昔於阿育王山寺會見君家好弟兄玉几峯頭看月坐
金沙井畔踏雲行追談往事如昨日久別初逢似隔生
太息故人今宿草西風吹淚各縱橫

余既晤桂亭明府旋送其還新田重贈以詩

二十年爲別逢君又送君何堪一揮手便隔萬重雲嶽
色隨帆轉灘聲作雨聞舟中對明月應憶白鷗羣

八月十七夜許正卿過訪贈詩依韻奉答

寂寂一鐘音蒲龕坐夜深秋燈無熱燄寒樹抱冬心不
是幽人至誰同冷處吟相留咒雲片勿使月輪陰

夜坐

古寺夜誰鄰孤禪影自親破窗風滅燭窺隙月尋人頗
得真寂義猶留未了因晨鐘數聲動愁見六街塵

秋夜

老猿解禪定夜久亦無喧室白月在壁燈昏風動旂孤
衾棲冷夢寒葉斂秋魂雨過添衣坐泉聲穿竹根

夜坐有得

丹桂吹香過碧岑
蒲團枯坐夜禪深
殘星墮戶白生室
秋鬼提燈綠入林
萬壑松寒孤鶴夢
千巖月落一猿吟
超然象外忘言說
惟有虛空印我心

八指頭陀詩續集卷之一終

八指頭陀詩續集卷二

釋敬安寄禪

碧浪湖感舊詩一首

湛湛湖中水，莪莪湖上亭。昔余恣幽討，每偕道俗經。
弭棹掇芳蕙，披煙憩寒汀。俄驚鬚鬢改，始覺歲月更。
陵谷一遷變，蘭蕙繼彫零。重尋迷術阡，往迹翳荒荆。
積阜蔽遠觀，枯魚唼乾萍。潛龍旣失勢，圻龜今成形。
逝川無迴波，浮雲靡停征。衰草競秋綠，寒山猶舊青。
感故生新悲，觀空有餘情。

山行旣暝還憩松寮宴坐有得述爲偈言

山人午睡罷山鳥時一鳴悠然起逸興縱步林間行溪
雨散微涼空翠搖孤清叢竹翳荒澗秋桂流遠馨白雲
賞我趣夾路如將迎林深不見人稍辨歸樵聲幽情既
已愜植杖返柴荆煙蘿含暝色鐘梵何泠泠夜深禪更
寂松際月孤明靜對忽忘照身心亦已冥言思難恍惚
強名曰無生無生豈可證一悟躋元扃神會罕與同默
默空含情

陳仲鹿觀察需次湖北新奉奏調陝甘將赴行在
來湘省親病故於鹽署賦五律十八韻哀之

二聖蒙塵日羣凶亂國辰生靈苦塗炭宮殿化荆榛戡

暴須良佐扶危倚哲人正平才絕俗文舉薦殊倫黃屋
求賢急丹書拜命新趨庭方適楚赴闕卽過秦鬼伯何
相促天公甯見嗔西河揮老淚南嶽失芳鄰煨芋竟誰
贈歌蒿獨愴神彭殤均大化支許或前因白社論交晚
青門悵別頻幾曾淹日月終古卧松筠苔冷題詩壁香
餘漉酒巾含悽開梵筴隕涕望楓宸徒切看雲思難留
砥柱身撫時空憤激嘆逝屢酸辛欲下巫咸問還將楚
些陳恐傷顏路意不敢哭回仁

義甯陳中丞挽詩二首

疾雨驚雷挾嶽馳天南一柱遂難支滄波東海橫流急

白首西山挂笏遲功罪一時原未定春秋千古豈能私
鄂州遺愛何容泯應爲公刊墮淚碑

見說辭家四十霜歸來舊業已全荒旣無彭澤五株柳
那有成都八百桑死痛青山難葬骨生憐白鶴與休糧
公罷官後結廬西山嘗蓄一鶴自隨道人平等無恩怨
今歲先公而逝公哀之爲銘以瘞猶自潛然對夕陽

李郁華明府以石濤所畫老樹枯禪圖索題圖中
原題有空山老樹一坐四十小劫十字因反其
意爲四偈

莫倚藏身有此圖如如不動祇跏趺忽然劫火燒塵刹

留得空山老樹無

一瞬恒沙劫數過休云是定祇名魔因他
不解禪宗意
死水徒然不起波

此事須憑一悟真虛空粉碎露全身回觀
文字皆糟粕
有口何能舉似人

末劫刀兵苦事叢瘡痍滿目盡哀鴻阿師
若具慈悲力
何忍低眉坐樹中

山居書懷十二韻

二十餘年事回思淚卽傾每憐龍象泣不
避虎狼行毒
草終難剪幽蘭恥競榮身全緣咒力道退
誤詩名未證

三乘果空堅五字城苦吟生白髮多病覓黃精坐久蒲
團破寒深布被輕老來耽靜僻客至懶逢迎苔蘚沿階
上藤蘿向屋橫池虛惟受月樹密但聞鶯冷翠藏陰壑
微雲養太清祇嫌樵子過使我小猿驚

遣興

鎮日蒲團坐若痴興來說偈便成詩傍人若問余何事
也要消閒十二時

感事二首爲王莘田作

皎皎晴虛絕點塵忽然雷火欲焚身老僧冷坐蒲團上
不信曾參竟殺人

君與某姓名相同被
誣幸大吏公明得釋

一紙疑書是禍根
小民忍痛復何言
始憐湛湛湘江水
終古沈冤有屈原

山居戲作

青菜堆盤任飽餐
幽居有味却難言
風雲變幻悲塵世
草木榮枯見道根
孤月自澄潭底影
千花徒艷鏡中痕
老來豪氣消磨盡
閒戲癡猿擲果吞

書懷兼呈梁孝廉

結習惟餘文字存
每憑定力攝詩魂
鬚從撚斷吟逾苦
一字吟成一淚痕

由來此事解人稀
白首淒其向翠微
雨過楓林秋瑟瑟

孤雲一片冷無依

却抱瑤琴不忍彈
松根煨盡磬聲殘
衲衣夜冷知山雪
明月梅花祇自看

欲把幽懷語向君
青天一鶴久離羣
人間無處留清夢
長在千峯頂上雲

贈張辛伯先生

八十一翁如後生
出門無杖亦能行
兒時親炙阮文達
老輩平交何子貞

公與何貞老俱出阮文達門下

台嶽看雲曾獨往
洞

庭醉月每孤傾
不須更問禪宗意
閱盡滄桑道眼明

贈沈炯甫卽次葛倦翁原韻

沈子抱孤憤雞中鶴出羣心齋能學佛筆陣自成軍入
道輕朱紱尋僧話白雲相交真莫逆不獨在論文

贈吳漁川太守六首

並序

庚子七月夷兵犯京師兩宮率王大臣貝勒數
人微服出狩閱二日人馬飢憊時公方宰懷來
奔赴榆林鎮躬迎車駕入城始進服膳慈聖泣
曰我出京至爾邑沿途不見一百姓何況官耶
汝獨迎我誠忠臣也語及義和團民卽痛哭失
聲蓋邊禍實由民教相仇也明日起蹕西巡擢
公知府未幾命赴兩湖催餉余與公別十年矣

重晤長沙爲述二聖蒙塵情事及恩遇之隆相
與痛哭於其行也賦五律六章以贈之

故人不相見幾度薊門秋忽奉秦中詔還爲湘上遊
白雲聊共話滄海尙橫流一掬傷心淚南來灑未休

煙塵方瀕洞朝士半偷生念子將王命慚余憇化城
空云龍象力難息虎狼爭欲上祝融頂迢遙哭帝京

强鄰何太酷塗炭我生靈北地嗟成赤西山慘不青
陵園今牧馬宮殿祇飛螢太息蘆溝水惟餘戰血腥

聞說西巡日慈輿涕淚頻可憐堆白骨祇是痛黃巾
邊地猶防寇長途不見人倉皇二百里供帳始微臣

莫小懷來縣曾停帝后車園蔬充御膳官舍奉宸居奇
遇人皆說忠臣聖所譽不知沾雨露感激更何如

天涯歲云暮王路復馳驅絕塞一鴻遠遙天片月孤行
吟辭白社歸夢繞黃圖回首衡雲隔還能相憶無

羅順循大令自直隸新歸又有日本之行作此贈
別

死地生還又別家一身如葉去中華秋風日落田橫島
海色寒生博望槎豺虎未平空有恨魚龍相狎靜無譁
扶桑到日應重九何處登高對菊花

題劉樸堂觀察白雲課耕圖

栽栽瀉山高湛湛瀉水流中有素心人愛此林壑幽豈
忘稼穡難繞屋皆田疇田夫力作苦歲時無少休晨光
猶未晞烟中聞叱牛山人憫其勞壺漿每見酬曰農聽
余言富貴豈外求勿辭四體勤五穀豐有秋披圖識深
意望雲心悠悠

寄葵園老人二首

九天一疏大璫驚垂老煙霞愜野情應笑山僧未忘我
與人猶自競詩名

老人老矣復何求白首栽松爲鶴謀今日巢棲霜露淨
西風長憶仲宣樓

小雪日過王胡鈞茂才觚齋戲題

觚齋不厭百回過一笑論文樂有餘
得句固應爲我喜有詩還要倩君書
孤城細雨重陽後古寺寒鐘小雪初
待拾枯松煮野菜相邀粗飯意何如

長沙黃仲蘇龍硯仙俱以知縣需次江南久別不見各作絕句四章寄之

問疾毘邪憶昔年一牀方丈共譚禪
文殊枉自多才辯杜口維摩意更玄

世界三千一粟看眼光如月照人寒
可憐天上四禪客屈作江南七品官

萬卷牙籤傲鄴侯等身著作自千秋十年宰相尋常事
懶向殘僧乞芋頭

青松手種已成圍不改清陰待鶴歸何日紫微山上寺
一湖煙水自忘機

右寄仲蘇

久與牟尼結淨因了然心地不生塵惟於陶令偏相念
曾作蓮花社裏人

香火緣深老不忘湘江風雪記聯牀故人徒有吳黃在
曩承贈詩有故人吳黃昨

相見誦子佳句逢人傳句

瘴雨蠻烟各一方

一刻滄桑幾變更大江東望不勝情昔年兩鬢青青客
料得憂時白髮生

聞道咸陽駐翠華，不禁清淚溼袈裟。
孤雲出岫宜爲雨，五柳成陰莫憶家。

右寄硯仙

題沈伯華明府吳興城南老屋圖卽次山陰中丞

原韻

浙游恨未到吳興，山水清奇自昔稱。
水作碧環明皎皎，山如翠浪捲層層。

曾談三乘鹿牛羊

趙松雪曾延中峯國師於吳興講法華牛鹿羊三乘大義

誰辯中

峯舊講堂松雪無人鷗夢冷

趙松雪鷗波亭亦在吳興

時聞僊梵下

殘陽

一幅城南好畫圖，蕭閒竹樹綠陰餘。
春風十里苕溪水

直接詞人白石居

姜白石故居距苕溪最近

貧僧亦有天台屋守戶溪猿想尙存
安得相攜入雲窟
卧看飛瀑老山村

題鄭湛侯明府停雲十二圖

淵明昔有停雲作湛老今爲話雨詩
北固繁筵猶在耳

東臺佳會豈堪追

圖中有北固繁筵東臺佳會諸詠

畫圖十二皆陳迹

世界三千總幻思觸我故人存歿感
虛堂對影淚如絲

哲嗣叔獻孝廉曾與余照影留別每一瞻對輒爲黯然

題魏春階司馬看劍圖

長鯨吸海波瀾枯神龍徙宅遺其珠
大千腥垢無淨區

人天隕泣宗社蕪昭陵魏侯烈丈夫古之任俠今則無
赤手欲將天柱扶龍泉三尺隨身俱酒酣看劍長歎吁
國仇那敢忘須臾青天朗朗明月孤行矣努力毋踟躕
殲除毒虺斬豐狐妖魅閃屍伏其辜血腥盪滌劍不汙
功成皈依佛之徒老僧待子蒲團蒲

武陵春傳奇書後

世已無淨土煙波寄此身長謠楚天暮一曲武陵春時
事紛棋局生涯托釣綸滄浪何處是滿目但迷津
而我出世者幽憂未可言有身成大患無地著空門塞
海哀精衛蒙塵痛至尊含悽向漁父休更說桃源

贈日本中炯含山

君從日出處萬里到潭州時事滄桑感風濤海國秋不
辭遠行役豈但美遨遊相對情何極高吟月滿樓

懷日本岡千仞卽次甲申夏日遊四明天童玲瓏

巖原韻

高人白首卧東瀛應憶天童水石清洞古苔深無客到
巖陰晝靜有蟬鳴松杉曾見當年植鐘梵同聽下界聲
雲海茫茫萬餘里因緣強自說來生

寄遯叟

九江廬阜下遯叟此棲遲常遣青鸞馭遙招白老兒哀

時餘涕淚辟世有須眉安得隨吟杖青山掇紫芝

白老見西山得道麟
精數降乩與公和詩

上林寺入院示衆

上林鬱旃檀不雜凡木香龍象此蹴踏豈容狐兔藏敬
也暗內修虛名徒外揚自辭雨華請久與人天荒焉知
十二載避席仍升堂寂寂本無照冥冥似有將願爲甘
露雲普蔭火宅涼願融百毒味併作醍醐嘗敢告大衆
言努力各自強勿隨識浪鼓沒我浮海囊勿被毘嵐風
撼我須彌王此事如磨鏡垢淨自生光但令狂心歇卽
是菩提場

辛丑夏俞壽臣旣歸江南爲詩補贈湘江之別並
寄其兄恪士觀察陳伯嚴考功兩家父子次錢
牧齋贈別蕭白玉原韻十首

久矣萬緣寂其餘別思何空持投轄意還忍聽驪歌湘
上春愁遠江南煙景多因之憫吾弟無計慰蹉跎

胞弟
子成

流落
江南

音塵雖已隔猶自悵離筵白榜春波棹黃梅細雨天重
逢方匝月小別已經年不折垂楊贈柔條亦可憐

卻憶陳公子追隨似目前因開白蓮社同放碧湖船高
閣坐秋雨孤蟬吟夕烟舊遊那忍說彈指十餘年

元武湖中月遙知泛短篷涼生蒲葉雨香送藕花風悵
望千山外沉吟五字中離懷無處寫珍重託郵筒

勝遊難再遇回首一沾衣舊雨幾人在孤雲獨自飛寒
燒楫樵火久息箭鋒機他日匡山頂相期皓首歸

比部別余久改官淮水濱買山曾有約蹈海復無人萬
戶同聲哭四夷何日賓九原如可作應更泣孤臣

謂四
覺老

人

出世嗟無補含悽卧紺園旣傷麟在野還慮虎窺藩靜
覺風幡動苦吟霜鬢繁知君情更切不寐月臨軒

慎郎

恪士
子

及師子

伯嚴
子

與我有幽期皎月光初滿浮雲

八指頭陀詩續集卷二
變豈知分飛從此日把晤更何時天地荆榛塞徒然眷
所思

且自拈花笑休懷厝火憂求仙原是妄媚鬼亦堪羞易
到無爲地難乘有漏舟故鄉期共返莫祇認并州
浮生如旅泊大劫祇崇朝早避紅羊出堅辭白璧招澄
心觀水月托迹向漁樵若悟無生理封書慰寂寥

夢洞庭得句

昨夢浮杯渡洞庭湖波汨汨雲冥冥岳陽樓上坐吹笛
飄落君山一髮青

八指頭陀詩續集卷之二終

八指頭陀詩續集卷三

釋敬安寄禪

酬但方伯惠扇

煩暑忽已失仁風忻奉揚如臨谿石坐自覺衲衣涼老
樹生新蔭幽蘭吐妙香何當慰黎庶披拂及林塘

疊前韻再贈

此老漫云老摩雲健翮揚高齋談淨理一雨送微涼鳥
雜梵音語風繙貝葉香謝公詩興好青草滿池塘

雨後茅亭小憩二疊前韻

茅亭宜宴坐鳥語自幽揚綠竹洗寒翠碧梧生夜涼禪

心無住相佛火有餘香定起看明月荷風來曲塘

桐桂山館三疊前韻

山館蘊芳馥清風時一揚庭陰不知午心定自生涼竹

几繙經倦藤花落枕香遙憐遊子夢千里下瞿塘

公長公子

子莫太守將由蜀奔母喪來湘

感事復呈四疊前韻

時事方棘手王風久不揚江湖波汜濫天地色淒涼獨
灑憂時淚長焚靜夜香知公心更苦請築捍潮塘

酬龔龍陽五疊前韻

哲人若蘭蕙芳馥靜彌揚眞想不隨俗清吟自灑涼公

磨心作鏡我熟戒爲香談笑入淨理蓮花開野塘

憶天台方廣寺

天台方廣寺杖錫憶曾經虎吼山欲動龍潛水亦腥仙
雲千嶂白鬼氣一燈青靈境難重到幽懷未易冥

題城南金剛院

城南古蘭若客至澹忘歸地僻囂塵遠堂深梵磬微嶽
痕青入夢雲氣白侵衣欲乞坐具地安禪靜掩扉

程子大讀余四明山水詩有贈次韻奉答

十載游踪徧浙東海濤翻雪吼洪鐘蒲帆泛月尋幽島
竹杖挑雲入亂峯最憶普陀浮海刹難忘舍利放光松

報君一語君應怖曾向空潭咒毒龍

四明深處舊禪房海色猶來夢裡蒼太白峯爲山所祖
大龍湫是瀑之王烟霞有約愁難踐松菊無人想就荒
今日因君話甌越萬重雲水自茫茫

送陳伯屏方伯入覲

忽辭蘿薜理行裝千里乘風謁

帝鄉卻指雲山留後約便隨鴻鵠起高翔湘城夜雨星
辰濕蹕路秋花劍佩香臨別殷勤煨芋贈十年箇味要
親嘗

省曇和尚自醴陵來索題雲巖寺詩

見說雲巖寺天然境最清幽泉穿樹出

有泉自樹中出者爲枯木井

峭壁碍雲行萬籟隨鐘寂雙池受月明寥寥坐禪地應可證無生

靈巖飛翠連衡嶽大刹知名冠醴陵萬古天青墮爲石
中宵鬼緣聚成鎧老猿伏澗啼秋雨饑鼠緣松嚙瘦藤
何日雲間結茅屋白頭相伴兩三僧

哭黃大令蓉瑞三首

逢人輒自嘔心肝古道懸知入世難祇合山林充大隱
強求菽水就微官十年五斗緣猶薄一死孤雲影更單
夢裏相逢還似昔贈衣應念老僧寒

昨夢大令過訪贈衣話舊情致殊殷

詞客江南信可哀，魂兮何日始歸來。
名山竟負當年約，亂世虛生絕代才。
地下修文應有俸，人間避債已無臺。
好將平日憂時淚，灑作黃泉酒一杯。

支許論交十七年，回思往事益淒然。
種蓮同結碧湖社，煮茗曾分白鶴泉。
自許漆園爲傲吏，獨推賈島是詩仙。
觀空尙漬袈裟淚，不是尋常哭逝川。

聞陳考功窮居江南，尙能周恤死友黃蓉瑞大令，感其風義，作此寄之。

謫宦棲遲淮水邊，故人貧病尙相憐。
興來共蠟遊山屐，窘極猶分買藥錢。
天上玉樓傳詔夜，人間金幣議和年。

哀時哭友無窮淚夜雨江南應未眠

送王翊鈞參軍之官浙江

浙中地勝擬蓬萊薄宦於茲亦快哉
台嶽天青雲海現胥江濤白雪山來扁舟夜泛湖心月孤嶼春尋水面梅
他日衙齋公牘少清遊應喜道人陪

送俞壽臣觀察之江南時舍弟子成方謀食江淮並及之

木落秋心苦何堪送故人煙霞老難別骨肉罕相親
請以愛我厚轉爲憐弟貧江南千里道悵望一沾巾

十月初三夜夢中得詩一首

大千劫火一時然鐵骨於中鍊已堅振錫深山解虎鬬
求珠滄海驚龍眠萬家香飯歸禪鉢八部花雲散法筵
兜率蓬萊俱不着蓮華佛國息吾肩

十月初五谷山掃剃度本師墓

微霜下林杪木葉皆飛黃送師瘞斯土俄已三重陽茲
來一展眺風物殊蒼涼秋山靄餘翠殘菊猶芬芳憶我
薙染時傳衣披我長師年未五十鬚鬢俱青蒼師命我
行脚遠帆南海航一身托雲水十載還沅湘師年六十
六面皺身則強日行三由旬迅若空鳥翔如何十四年
老病成頽唐我從瀉山歸侍疾未離牀我每泣語師請

愼溫與涼師笑謂我言是身眞革囊盛穢無一淨捨之
復何傷若人負重債於理豈不償五陰旣非有四大隨
分張師竟棄我去游神泥洹鄉慧燈寢恒照苦海失津
梁四流欲誰濟昏夜何茫茫緬懷平生儀灑涕對迴崗
山川有搖落斯痛永無央

由谷王山越嶺行至寶林菴時常長老爲其徒敏
眞徒孫性華修墓工竣敏在日與余言道甚洽
歿已二十八年性則爲余法嗣因作詩一首志
感兼呈常公

峭嶺蘿徑微抗袂越雲行叢薄帶暝色寶林開化城常

師此駐錫頭白罕所營羣推法門舊與余爲弟兄吁嗟
三十載迅若流電驚念公賢弟子實爲柰苑英慧悟信
絕倫惜不永其齡性也繼敏秀從我問無生無生詎有
滅高塚何崢嶸寂子豈真寂林鳥演梵聲皎皎雲間月
猶似道眼明神理固仍在老淚徒縱橫勿爲逝者哀存
歿皆凡情

送和菴上人主錫嶽麓萬壽寺

蘭若闢西晉法崇實初祖衡山何巖巖分秀鍾靈字孤
城隔湘波經臺隱烟樹風篁響梵音鶴泉流法乳我昔
維摩室辦香笠雲圃

笠雲圃公爲余
嶽麓得法本師

鈍根負虛望於道

曾無補上人有雄力龍象繩其武旣應大衆請詎畏羣
魔侮願彼篋戾車同沾甘露雨伊余忝法親來聽上堂
鼓卻笑瀉山牛和葦爲余瀉山法嗣今作虎岑虎麓山寺有虎岑堂唐景岑禪師
遺事見傳燈錄

郭詞白大令招集碧湖爲展重陽會卽席有作

霜寒天宇淨碧雲生微陰鳥沒烟際帆鐘清湖上林夫
君敦古歡良辰展幽尋駕言踐靈約緬焉穆余襟伊蒲
悅禪味迦葉動苦吟青條殞秋露黃菊艷餘金歲宴興
未闕交新意逾深前塵悵已渺眞賞忻在今勝游安可
紀聊用謝知音

前詩未竟其意復紀一律

紫微山上碧湖宮轉瞬浮雲往事空
高士蓮花還結社老僧霜鬢已成翁
十年再展重陽會一座惟餘二妙同
謂曼刀潤民二公曾侍玉池老人展重陽於此太息玉池今宿草忍聽落木動西風

碧湖懷古疊前韻

湘春門外馬王宮五代荒涼霸業空
閱盡繁華成老衲漫將時事問漁翁
湖山亦逐滄桑變天地徒看日月同
塵世興亡何足論且携長笛弄松風

孫姬瑞孝廉聞余談浙東山水有贈次韻答之

飄然十載浙東游，皋壤生涯信謬悠。
鐵鉢夜敲青嶂月，銅瓶曉漱碧潭秋。
定中水闢窺龍窟，眼底雲生結蜃樓。
更擬明年渡瀛海，扶桑咫尺引吾舟。

袁叔輿戶部寄示金陵詩社門存唱酬韻見懷之

作次韻奉酬

王寅

卧雪清承舊德門，新詩遙寄到荒村。
一時相見風流盛，千里如聞笑語喧。
戀闕定迴金鎖夢，探春初返玉梅魂。
終當杖錫來相訪，割取安禪片石存。

寄題易哭庵觀察廬山琴志樓疊前韻

大好琴樓近石門，等閒拋却綠蘿村。
且尋笠屐林巒約，

遠避風濤海國喧
三峽泉聲蘇渴病
五峰雲氣淨詩魂
匡廬山色清如許
中有蓮花舊社存

懷義甯陳吏部三立再疊前韻

聞君打槳返章門
拄杖時尋郭外村
襟上長餘山氣潤
花間微覺鳥聲喧
舊游可憶白雲侶
近事應傷碧海魂
彈指滄桑紛萬變
中原一片夕陽存

憶金陵舊游三疊前韻

托鉢曾沿白下門
西風黃葉舊時村
鍾山月出夜禪寂
淮水潮生午渡喧
萬古烟雲悲過客
六朝花雨冷香魂
定林寺裏經行處
妙意微茫空自存

東坡有妙意持行
定林寺及妙意有

在終微
茫之句

述懷答友人四疊前韻

何分白屋與朱門俯視閭浮等一村
施食每憐山鬼嘯安禪曾制毒龍喧
沽來蓮社高人酒醉倒梅花處士魂
文字情深道緣淺多生結習恨仍存

寄陳公孫師曾五疊前韻

公孫宿世我同門甬上猶留乞食村
山色當窗常在定

潮音振海了無喧曾參柏子禪宗話

僧問趙州如何是祖師西來意州云

庭前柏樹子

錯認桃花倩女魂萬古青天堪作證
浮雲散盡

月孤存

贈陶荔南

陶公奇氣若無人
垢面蓬頭率性真
一卷孤吟寫冰雪
空山茅屋自生春

如子信有貧賤癖
鮮衣美食轉生嫌
省城隍廟無常側
鬼語啾啾睡未甜

日本岡千仞寄次甲申夏同游天童玲瓏巖韻見
懷并所著觀光紀游感疊原韻二首

尺書報我自東瀛
展讀如聞笑語清
春水綠波人萬里
幽谿碧樹鳥孤鳴
觀空猶憶前塵影
問訛還勞遠寄聲
一別玲瓏巖下路
滄桑百感竟叢生

每聞海客話東瀛風俗還如太古清所學皆能爲世用
其人不僅以詩鳴閒雲亦抱爲霖意野鳥都含讚佛聲
中日本來唇齒國掣鯨休使海波生

姜市掃周孺人墓

并序

周孺人者余同里李春圃母余幼失怙恃爲人
牧牛數過其門孺人知余爲孤兒常呼與語躬
爲縫衣櫛髮慈惠備至余出家後孺人見之哭
云汝奈何爲此也今春二月余應四明天童寺
請還里拜辭先塋詢之則孺人歿已十年矣因
謁其墓爲五絕四章以代哭云

昔人感一飯千金報其恩我懷李母德袞袞拜墓門
未拜涕先流兒時此牧牛憫我無母兒時常梳我頭
穉年失怙恃捨母無所依我飢飽我食我寒溫我衣
欲去復躊躇遺恨此山隅惟將雙淚痕流作報恩珠

長沙上林寺退院將之天童辭衆二首

粥飯緣輕祇一年無端又泛浙東船此心不動隨來去
一月千江普映圓

無窮離思水雲寬龍象依依欲別難白首忽辭湘上去
青山長向越中看

由長沙上林赴四明天童寺請回憶湘中故舊愴

然有作

老作離鄉客迢遙憶故關夢回湘上寺人在越中山舊
雨忽爲別孤雲今又還龍潭照鬚髮不似昔時顏

甯郡高公子吹簾司馬奉其母李夫人來山修建
水陸以詩見贈次韻三首奉答

法雨灑初地慈雲生遠陰如何天上曲來和草間吟靜
室絕塵想清言愜素襟賞音今已遇不在伯牙琴
六一賢太守甘棠列郡陰因陪公子話還憶醉翁吟白
雪聞君咏清風快我襟何須奏流水悅耳自成琴

誰愛天童寺喬松廿里陰客從雲外至僧在定中吟谿

竹淨搖翠巖花香滿襟時焚柏子坐弄我沒弦琴

天童寺書感

十八年來復此游蕭然不覺雪盈頭名山事業吾何有
塵世滄桑佛亦愁太白峰前雲似蓋玲瓏巖下月如鉤
平生無限傷心淚稽首空王獨自流

夜過瓜洲鎮

江寒五月似新秋隱隱金焦水上浮夜半鐘聲呼客起
朦朧烟月過瓜洲

自四明歸長沙經洞庭作

湖上微風水不波片帆無恙夜重過長沙此去翻成客

歸夢如山向越多

將歸四明別朱八菊尊

甬上初還又別君
滄桑時事豈堪聞
道人避地向吳越
閒聽清猿嘯白雲

題李仲乾悼亡詞後二首

潘岳悼亡情太癡
道人一見欲焚之
誰將天女紺青髮
繫汝茫茫萬古思

曠劫沈淪失此心
情塵擾擾淚波深
華鬢一墜仙緣盡
海碧天青何處尋

羅順循大令將之燕臺余亦有四明之行作此志

別

十載重逢鬢已絲
布帆明日又天涯
風塵擾擾向誰語
雲水茫茫安可期
海上鯢鯨方作窟
山中鸞鶴欲無枝
惟餘一片青天月
越嶠燕臺照別離

赤壁懷東坡居士

坡仙人去已千秋
赤壁還思前後游
寂寂江山共誰語
一帆明月過黃州

新堤

江豚吹浪與人齊
江鳥呼風日色低
隱隱帆檣泊雲際
青蘆一片是新堤

題紅雨樓遺稿

紅雨樓頭踏翠過落花芳草恨如何美人黃土埋香久
司馬青衫漬淚多入道宜醒蝴蝶夢傷心莫聽鷓鴣歌
今看柳絮因風起想見當年謝女娥

海上與眞上人話舊

孤雲本無定於此忽相逢巖壑思前事鬚眉非舊容霜
寒洞庭葉風送海門鐘明日一揮手秋山又萬重

感事

巖谷容吾輩天朝雨露偏祇緣充學費遂議割僧田古
寺晝常閉禪房夜不眠何當乞甘露一爲洗腥羶

寶慶寺掃慧公塔

慧老久云寂追思亦可傷振衣登太白把晤記錢塘
歲月去如電鬚眉漸有霜夕陽瞻塔影不覺淚成行

重晤樓杞伯

十餘年不見一見淚雙流舊雨幾人在孤雲獨自留
西風吹短鬢落日下高樓昔別君方壯今來成白頭

重晤胡俊卿李子仙兩秀才

明州再到事堪哀白髮惟餘兩秀才一棹還湘驚歲晚
寒梅二十度花開

壬寅秋瞿芷垣司馬偕馬芥堂明府枉顧天童與

芷翁話舊得兩絕句又作二首送馬公歸蜀并
東陳粒唐觀察陳有東山草堂十二圖東山雲
岫其一也

故人不見十餘年留結空山一宿緣看月聽猿思舊事
松風涼露夜難眠

同憶湘樓夜雪時敲冰煮茗坐談詩那知人事今來變
頭白空山此住持

西蜀山川天下雄崎嶇道路說蠶叢請看太白青連海
可似峨眉翠掃空

錦江秋色故人居欲寄迢遙一紙書莫忘東山好林壑

閒雲出岫近何如

寶幢重過何珊洲秀才宅

寶幢河邊處士居青山頭白尙攤書故人寥落鬚眉在
一笑浮雲萬變餘

上虞經君甫居士來山以詩見贈次韻奉酬

上虞老居士邂逅喜相逢得句題紅葉開軒對碧峰知
公愛淨理與我論機鋒一笑林塘暝高樓動晚鐘

禪心老何似死水不生波雨過青山淨秋來白髮多飛
雲思出岫倦鳥懶移柯遠辱高人顧因之發浩歌

次經君甫居士留別原韻卽送其歸鏡湖

無人共聽蓮花漏有客來參柏子禪自許烟霞爲道友
不妨松鶴與忘年清宵醉月焚香坐白晝看雲枕石眠
何事便隨流水去青山紅樹放歸船

空山煮石斷炊時長者黃金肯佈施懶作昌黎排佛論
苦吟潘岳悼亡詞連朝聽梵心如水一夕悲秋鬢已絲
歸到鏡湖烟景好白雲黃葉入新詩

題盧吟秋茂才夢紅蓮詩卷

盧生才豔是神仙慧業多生豈偶然一卷夢紅詩卷子
風情不減杜樊川

聽唱蓮花格調新能令枯樹一生春虞山不作梅村死

肯與漁洋作後塵

老去禪心百不思偶然乘興爲題詩却憐一管生花筆
祇作癡人說夢詞

秋日病中漫興次洪純伯明經見贈原韻二首

恒沙劫骨盡燒然猶有文人未了緣靈運多才後成佛
孟公無慧早生天病容已似秋山瘦詩卷空勞島國傳
時日本僧方購余拙集還國欲咒蓮花生鉢底毒龍吐霧漫相纏

高士文章海內雄清狂應與老僧同蕭梁以後無才子
趙宋之間有放翁陸詩情韻俱絕又極自然非詩人所能易及不許盧仝爲

茗友余少年茶量最宏一飲數十甌盧仝七碗何足道却呼賈島是詩僮浪吟

直欲凌窮髮鵬背星寒任颶風

招鄞邑侯黃鞠友司馬游天童

太白峰高接四明玲瓏巖古最馳名
花開花落知春夏雲滅雲生驗雨晴
八月木樨香可好六時仙梵夜彌清
探尋宜趁簿書暇特遺長庚下界迎

爲翟少府題畫二首

秋山紅葉豔於花小艇橫江日欲斜
着箇茆亭深樹裏幽谿鹿過便爲家

隱隱花宮在上頭下方水木湛清幽
雲巖深處宜禪寂瀑布無人冷噴秋

寄懷俞恪士觀察江南并柬陳伯嚴吏部十二首

并序 癸卯

元宵後一日懷弟子成自金陵來盛稱觀察俞公雅意因爲七絕十二首奉懷并柬陳吏部蓋歲己丑吾湘鄧彌芝先生應許仙屏方伯聘主講金陵曾文正書院約余由衡州同舟東下時觀察與吏部及曾重伯吳雁舟兩太史俱自京師還湘會於白門日事游眺一時盛會也今許鄧均歸道山曾吳皆遠宦蠻荒公以道員需次兩江吏部亦作寓公於此云

昔時湘上聽離歌轉瞬狂瀾喚奈何淮海千帆爭利涉

想君因更慎風波

公昔由湘之官白下行至靖港遇暴風舟幾覆有書報余

塵世紛紛變態新蒼山面目亦藏真芒鞋獨上千峰頂

倚杖看雲憶故人

一白揚帆下洞庭猿吟鶴唳不堪聽江南江北山無數

長入枯禪夢裏青

去年飛錫向長庚

長庚又名太白卽天童也

繞道還思入石城風利

舟行不能泊青山遙望但含情

萬松青繞夜禪殘對月題詩淚暗彈多謝鳳凰臺畔客

春風猶念鵲鵲寒

子成落魄江淮蒙公爲之提獎

一池新漲綠於藍千里離懷老不堪料得官梅動詩興
十分春色在江南

若棹扁舟向浙東青天一髮是天童謝公行處今猶在
好看名山入剡中

斷巖千尺一枝藤終日凝然萬慮澄爲我寄聲陳吏部

匡山留待白頭僧

吏部與余有歸老匡山之約

白門佳會幾何時回首人間鬢已絲記否秦淮雙槳過

花枝爭拜老禪師

昔公與吏部約余游北極閣歸舟過秦淮河吏部獨上岸使女士數人於

樓上合掌呼八指禪師者再

香湖居士舊詩人元度交情老更親太息兩公俱物化

同思往事一沾巾

雞鳴寺裏憶偕行
鐘梵蕭蕭洗耳清
夜半霜風驚折竹
依稀微月定中明

元武湖邊共倚樓
藕花如雪隱行舟
何時復逐輕鷗去
雲水光中續舊游

黃鞠友司馬以小林棲詩四首見示次韻奉贈再
速天童之游

林棲誰爲小仙鶴
此中巢白雪難爲
和緇衣敢論交詩
情清似水道味合如膠惟負名山約
峰巒欲獻嘲

一縣春風暖青山入夢無
流鶯欣得樹過雁穩啣蘆種

柳心雖切栽花計豈迂欲圖三嘯樂應顧虎谿廬

暫拋黃綬事且慰綠蘿心小艇生波細長松夾道深但
看千嶂合不受一塵侵待掃雲邊石谿聲共苦吟

我亦幽棲者依巖屋數椽松窗延月朗竹簟引泉便得
句還呈佛忘機欲廢禪偶聞樵客語因識使君賢

趙仲青二尹曾爲衡陽令鄭湛侯明府書記別十
年矣今遊宦四明知余主席天童爲詩見寄次

韻奉酬兼懷湛老

天涯書劍遠翩翩感舊知憐老鄭虔三絕白頭猶薄宦
一官黃口亦爭賢故人應有停雲作懶衲還存煨芋緣

今日吳霜俱點鬢論交怕說十年前

前詩未竟其意復成絕句十五首追懷往事并訂

天童之游

一辭衡郡十經秋風雨長懷趙倚樓野鶴閒雲兩無定
分飛何意到明州

昔時朋輩半彫零落木寒泉不忍聽幾度衡陽孤雁過
惟餘嶽色向人青

鄭公櫟散鬢蕭疎寂寞長沙憶舊居解印歸來復何有
殘年乞米向僧厨

共稱陳實有佳兒

謂湛老三公子叔獻孝廉

痛惜曇花一現時留得

衰翁貧病在眼枯無淚向人悲

白髮休文老幕賓

謂湘潭沈子粹

當時才調更誰倫前年亦報

湘潭死曾對梅花哭故人

人生如寄復何常回首前塵枉斷腸吳越山川堪送老
與君不用憶衡湘

天童名勝冠東南佛地羣推古刹竿萬疊烟巒青在眼
試扶杖忞幽探

玲瓏巖在寺之西陡削登天不用梯翠壁蒼苔待君掃

新詩好和放翁題

陸放翁有題玲瓏巖詩

上古巢棲無一楹義公梵行感金精侍供薪水來童子

從此青山有姓名

晉時義興禪師於此誅茅感太白星化為童子供給薪水故以名也

太白峰高蘿徑微登臨翻訝鳥低飛
蓬山咫尺通呼吸欲挾星辰下界歸

巖谷重重覆碧蘿此中幽趣引人多
涓涓不斷龍潭水竹簍穿雲入飯鍋

十里長松青到門雙池如鏡淨無痕
晉時蘭若千年樹猶有庭前古柏存

義興禪師手植獅子柏尚存

天下禪宗宿所稱傳衣自昔有神僧
惟持一點光明種散作人間無盡燈

密雲悟禪師中興天童其枝葉偏佈海內故稱天童為天下禪宗

雲門餅子趙州茶個味能嘗是作家
雪後園林尋虎跡

寒窗分韻鬪尖叉

隔水幽花入戶香
時來雲氣濕衣裳
呼童淨洗谿邊石
待與高人話夕陽

八指頭陀詩續集卷之三終

八指頭陀詩續集卷四

釋敬安寄禪

贈陸漁笙太史卽次其生日感事原韻

瓊島吟歸莫問年青松手種蓋初圓講筵人坐春風暖
試院茶思舊日煎北海無尊不醉客東山有夢亦朝天
月湖烟景今寥落白社重開望大賢

奉訪陸太史次前韻二首

相逢休話永嘉年痛哭金甌缺不圓佛眼亦因塵劫閉
禪心如在滾油煎七分擬割花宮地

時議僧道十分田
產者抽七分充學

堂經

費一綫憂存杞國天太息江河今日下中流砥柱賴

公賢

不幸同生衰晚年腥羶分佈地球圓蝸頭有利都爭括
龜背無毛尙苦煎縱是魯連難蹈海若非靈運定生天
知公便死猶睜目王室中興望後賢

前詩意猶未竟三疊前韻

一卧滄洲今幾年澄波浩月悵孤圓罡風欲撼三山動
劫火能將大海煎白髮詞臣老憂國緇衣釋子忝談天
四明耆舊彫零盡魯殿巍然存一賢

過陸太史宅奉題四疊前韻

小隱城西那記年此心如水平任方圓谿邊茅屋牽蘿補

松下寒泉帶月煎一杖白雲行樂地四山黃葉著書天
老來萬事都無累陳實人稱有子賢

山居二首五六疊韻

一室蕭然懶計年漸看鶴髮蓋頭圓時煨野芋留雲餉
自汲寒潭掃葉煎萬壑松濤明月夜五湖烟水白鷗天
老投巖谷藏吾拙火種刀耕效昔賢

林間小住已年年掃石爲床枕木圓閒剪谿雲將衲補
淡收山翠當茶煎半鉤白墮巖前月一綫青來樹裏天
無事巖中時晏坐渾忘十聖與三賢

出佛經三
藏法數

山居兼懷陸太史黃司馬七八疊韻

寒盡深山又一年雙池皓月幾回圓世情淡似秋雲薄
禪味清於夜雪煎人在定中忘白日屋從破處補青天
由來佛法無多子翻覺毘耶杜口賢

寂寞幽居老忘年忽驚珠露滴松圓碧蘿風動蒲龕冷
白朮香聞瓦罐煎不許微塵生淨土欲移定石坐禪天
山中聽罷蓮花漏苦憶陶潛解印賢

月下對梅

高冷不宜人蕭然自絕鄰四山殘月夜孤驛小橋春暫
對翻疑雪清香不是塵逋仙猶認影誰復識其真

雪後尋梅

積雪浩初晴探尋策杖行寒依古岸發靜覺暗香生瘦
影扶烟立清光背月明無人契孤潔一笑自含情

謹次黃鞠友司馬甬江留別原韻四首卽送其行

離歌乍聽嘆飛蓬萬戶愁侵甬水東不獨枝頭驚宿鳥
可堪草底泣寒蟲白雲有意攔行路碧海無波見治功
太白峰高如峴首他時墮淚憶羊公

攀轅無計駐征驂別思偏教老衲諳芋火生涯容我懶

木樨公案復誰忝

山谷忝晦堂禪師有木樨公案

徐公美已推城北

謂前

任徐公

陸老心常在水南

陸放翁詩坐衙常對水南山

此後枯禪倍

寥落青山白髮老何堪

甘棠聊借一枝棲
人我渾忘物論齊
萬樹春風無病葉
四山殘月有啼雞
飛花片片輕隨棹
芳草萋萋遠映隄
莫向離亭愁折柳
此身同在浙東西

行舟已向綠陰藏
忍見南湖舊社荒
肯負烟霞忘宿約
便攜琴鶴理輕裝
烏紗白衲難爲別
黃綬青松兩不妨
千里神交知不隔
詩成應許寄支郎

天童坐雨呈鞠友司馬次同人原韻

古殿燈昏磬韻微
谿雲擁樹失朝暉
萬松鎖斷人間路
莫怪山僧與世違

薜蘿偶作簪纓會
山水長留文字緣
世外烟霞堪嘯傲

城中車馬莫言旋

楊柳風輕乳燕飛桃花流向釣魚磯
雨餘山色轉明淨萬竹分青上衲衣

山中十日且吟春嘗取山厨筍蕨新
休笑枯禪太枯寂無情花鳥亦相親

乘興宜登絕頂游中原一髮望中收
可知太白高無敵祇有青天在上頭

春山漫興仍次前韻

春山寂寞語人稀倚樹含情對夕暉
流水落花何碍去白雲芳草莫相違

道人活計自天然何用營求涉世緣碧水灣灣如帶曲
青山箇箇似螺旋

黃鶯曉坐濕難飛昨夜谿痕上釣磯試出萬松關外望
春田都似水田衣

連朝風雨阻行人看取庭泥虎迹新破衲添棉猶向火
萬山寒翠老難親

晚年愛靜息交游遙碧空青淡不收懶更登樓窮遠目
此身已在萬峰頭

次韻酬盧吟秋茂才二首

老去猶求一字師敢云得失寸心知不貪成佛生天果

但願人間有好詩

盧郎才氣壯青年秀句如花帶露妍惱得山僧聞不得
欲逃詩債泛湖船

黃鞠友司馬二月十七日偕友人入山盤桓兩日
酬唱甚歡因賦五言十六韻以志勝遊卽用贈
別

我公興不淺侵曉出東門以踐名山約而忘案牘繁維
舟楊柳岸沽酒杏花村野徑隨樵入荒谿逐鹿奔青松
迎夾路翠竹引行軒古寺鳴鐘寂禪房笑語溫盤殮甘
筍蕨世味厭雞豚蟒塔搜神蹟龍潭問水源六時雲繞

棟連日雨翻盆雖使清游阻無妨佳會敦緣蘿情共話

紅豆夢留痕

天童有紅豆巖公自號紅豆夢中人

擊鉢聯吟榻攀轅慘別

魂烟霞人自棄邱壑道誰論去矣冲霄鶴其如嘯月猿

良辰難再至真契久應存此後勞相憶逢僧好寄言

雨中遣悶疊鞠公韻四首

道人心愛靜避世入雲峯簪笠晴收芋袈裟晚晒松寺
藏千畝竹夢破一聲鐘行脚吾已倦閒拋五尺筇

塵飛不到處插漢有奇峰室白雲生棟衣寒翠染松苦
吟方得句喜極欲鳴鐘擱筆一長嘯蕭然倚短筇

四明眞佛地太白最高峰虎踞千巖石龍蟠萬壑松谿

雲寒夜楊山雨濕晨鐘欲出愁泥滑苔痕上竹筇
遠與塵境隔門前鎖萬峯禪心潭底月僧臘殿前松殘
雪融春嶼寒谿咽暮鐘客來方問法一笑便橫筇

登玲瓏巖次同人韻

千古玲瓏勝清游各一時且尋林下趣休話劍南詩養
性非關酒忘情不採芝但須腰脚健莫負紫藤枝

上巳日獨登玲瓏巖眷懷前游得五古一首卽寄

鞠翁

棲鳥嚶嚶鳴伐木丁丁響念茲懷故人良辰悵孤往丹
鳳已辭岡白雲猶在杖悽悽感去留忽忽成今曩靈岩

再攀蹋神會俄俯仰谿桃失舊姿林旭延新晃幽苔繡
禪石空翠潤琴幌山水轉澄鮮惜無同心賞遙賡紅豆
吟鬱我青霞想

重過石頭城登掃葉樓

海風送帆楫重過石頭城地失盤龍勢樓餘掃葉聲三
山天外落二水檻前明惆悵古今事浮雲空復情

題夏伏雛燕北紀難圖二首

輦下忽交兵煙塵暗帝京黃巾惟殺戮白骨苦縱橫安
逸慚諸將艱危累聖明河山餘破碎回首不勝情

倉卒誰言戰都門踞虎狼衣冠迷草野宮殿冷斜陽石

馬趨無汗銅人泣有霜披圖意悽惻不覺淚沾裳

與俞恪士觀察重登掃葉樓

高樓矗立水雲間與爾重登鬢已斑千載洲仍餘白鷺
六朝事往剩青山寒煙古寺鐘初度落日中原鳥倦還
塵海滄桑那忍說且憑尊酒一開顏

山行露宿

松根當枕草爲氍月白風清放膽眠山鬼不尋窮衲子
恐儂索取草鞋錢

題李藝淵觀察慕萊堂圖

并序

按老萊子楚之蒙山人今臨江府有老萊亭卽

其遺蹟也藝淵觀察守此郡時以不能迎養築
慕萊堂於署東以志慨云

臨江誰築慕萊堂仙李盤根奕葉昌衡嶽鍾靈倍英俊
蒙山遺德更輝光白雲迴望情何極綵服承歡老不忘
豈獨蘭階歌孝思郡人猶自頌甘棠

嗟余七歲作孤兒我弟呱呱斷乳時度母生蓮常自誓
乞鄰借米每啼飢傷心故里辭親愛祝髮空門賴佛慈
畢竟深恩難報答披圖不覺淚如絲

過顧石公居

城居車馬却閒閒草色當門綠不刪暑氣自銷池上竹

清談如對剡中山
荷花香送窗三面
楊柳陰藏屋半間
高士幽棲真絕俗
月明惟見鶴孤還

俞恪士觀察招集後湖次顧石公韻

四面水光涵波涼
鷗夢酣微吟過竹院
一笑倚蒲龕池蓮
紅間白徑草綠於藍
忝與羣賢集聞塵淨妙談

白下別陳伯嚴考功

與君俱老矣回首一沾衣
白下重爲別青山獨自歸
晚年情更苦舊社事多違
此後休相憶孤雲無定依

題文小坡內閣石芝詩夢圖

達人澄內觀足不出戶庭
室虛雲共白夢裏山猶青
抱

冲體自舉翼彼元鶴輕靄靄石芝秀實惟德斯馨聖境
與神會詎曰無因生湛然心境明萬象無潛形一悟排
言詮夢覺兩冥冥

六月十八夜訪俞恪士觀察新居坐池上納涼卽
事

柳梢微雨過池上早涼生坐覺綠陰好如臨碧澗清徘徊
絢片雲影斷續一蟬聲此後海山隔難忘今夕情

金陵別李二翰林瑞清

天風吹海立送我石城游偶與故人會還迴越水舟白
門寒暮雨明月照高樓悵望烟波濶孤雲隨野鷗

贈劉樊庭觀察時寓居毘盧寺

樊庭老觀察白首卧祇園避俗聊自適逢僧笑且言筭
蔬供小酌風雨掩重門宦味如秋冷城居寂不喧

余將歸四明夏伏雛以詩贈別次韻答之

歸卧越中寺萬松青到門更無塵事擾但覺瀑聲喧此
地難爲別他時更愴魂惟留滄海月長爲照清尊

將歸天童別劉應洲

久悵水雲隔相逢轉自憐十年俱老矣兩鬢各蒼然西
風白門柳落日越江船歸路滄江晚澄波月正圓

登太白峰絕頂眺海

何處登高豁遠眸
振衣直上亂峯頭
青天欲墜雲扶住
碧海將枯淚接流
萬里烽烟連鳳闕
一時雷雨起龍湫
河山北望情何極
鯨浪誰能靖五洲

次車眉子廣文見贈原韻四首

平生洗眼水雲寬
五嶽羅胸翠一團
行脚天涯吾已倦
將心不復與人安

衡巖煨芋一枯禪
破衲離披懶問年
偶與高人成邂逅
無言相對亦前緣

時事滄桑百變新
忘機鷗鳥亦傷神
腥羶滿地難容足

願作維摩畫裏人

公工繪事

新亭收泣復何人莫漫煙霞寄此身世上悠悠甯足道
好將書劍淨風塵

漫興四首仍次前韻

大千一粟未爲寬打破娘生赤肉團萬法本閒人自鬧
更從何處覓心安

莫笑天童八指禪蘿衣草履自年年多生結習銷磨淨
山水惟餘文字緣

千年詩思碧雲新不羨湯休句有神願向空王乞眞印
誰甘慧業作文人

此法能傳有幾人百千萬劫坐禪身虛空粉碎無餘事

佛祖猶爲鏡上塵

寶慶寺益舟上人新構佛殿僧寮賦此志願兼懷
其師祖慧修長老

華嚴樓閣又重開八部同瞻一善財銀杏當門寒有子
金沙佈地淨無埃林間猿鶴窺禪定海上魚龍聽梵來
白足高風思慧老看從法苑剪蒿萊

八月十五夜海上望月有懷明果師弟

萬里青天無片雲此時望月最思君一輪本自同圓照
碧海清湘了不分

寄懷金山妙湛首座

大徹堂中首座師江干一別見無期居山舊侶今誰在
出岫閒雲各自馳白髮喜聞猶健飯滄波遙隔但含悲
何當復踏金鰲頂汲取中泠慰渴思

金山大定長老八旬傳戒寄詩二首奉讚余廿九
年前曾侍此老巾拂白頭懷舊有逾常情

入定金山寺風濤寂不驚諸方惟一老末法亦多榮屢
閱浮雲變仍看寶月明

佛經有寶月佛金山
米時有寶月長老

曾親侍巾

拂白髮悵余生

華蓋盈龍窟遙知法會開能傳千佛戒定上九蓮臺海
濶杯難渡天空鳥倦回惟憑清夜夢還禮德雲來

金山
妙高

臺乃華嚴會上德雲比丘聖跡故蘇詩
云前世德雲應是我依稀猶記妙高臺

天童結夏請玉泉祖印法師講楞嚴經畢法師將

赴蕪湖普濟寺請因作五絕句奉贈并訂明年

開演法華之期

玉泉法派最汪洋中有蓮花萬古香此是台宗根本地

孫枝一葉又芬芳

天台智者大師出家
玉泉法師乃其遠孫

三藏靈文信手拈請師為眾講楞嚴萬松影靜爐煙細

山鳥啣花時入簾

草木均沾法雨青玲瓏巖石亦通靈羊牛山上成羣卧

老虎持齋要聽經

講期內村人時見一虎
出沒林表與牛羊相狎

天台教觀細曾諳妙悟如師好放參怪底行騰留不住
一帆秋色過江南

莫輕半偈重黃金萬劫禪那究此心留座人天爭拂拭
明年還聽海潮音

金山慈本西堂來天童聽講適余之金陵及歸師
已去旬日矣因悵然作一絕句奉寄

君到山中我出山無緣茗話對清顏匆匆却返江南棹
誰啟松關放鶴還

去歲得徐劍石茂才由湘入秦抵襄河書遲遲未
復今秋忽於書帙中見其舊札觸我離思作詩

代簡并寄王翊君大令

去歲襄河報我書遲遲未覆一年餘水雲意冷思君切
文字情親與世疎大海魚龍秋寂寞故山猿鶴近何如
寄聲煩問王郎訛黃浦歸帆可憶余

自信篇并寄明果師弟

自信凡夫願力眞覺場終滿利生因掀翻大海浮漚影
珍重十方行道身劍樹刀山都不避波旬篋屨任爲鄰
與君世世爲兄弟

用蘇句

同助如來轉法輪

屠廉訪繼室王夫人挽詩六章

太白秋高木葉殘輝沉寶婺夜迷漫却憐遊子歸來晚

霜萎靈萱不忍看

使君持節粵東時內助多才福命奇萬樹紅霞荔支熟
吏人相見祇談詩

清芬令德儘堪傳助賑延宗世更賢善了平生夫子志
柏臺含笑向重泉

儒林風雅出閨門莫作尋常女士論脂粉分資共石印
水經七校注猶存

夫人父履軒先生家藏七校水經注世稱善本夫人出資重刊

白首長齋大士前不生佛國定生天西風齊洒孤寒淚

肯拔金釵置義田

夫人建義塾延師課孤寒子弟

驚聞王母返瑤池山色泉聲也動悲自愧枯禪才力薄

強歌薤露獻哀詞

舟中望金山感作二首

波心浮玉寺不到三十年偶乘賈舶下近與城郭連人
事何嘗定山川亦變遷黿鼉出沒處今見牛羊眠
片石倚枯藤安禪憶昔曾虛空皆粉碎駭浪任掀騰偶
與烟波別俄驚歲月增青山如具眼應識白頭僧

次唐人張祜題金山寺韻二首

一片琉璃水空青淡不分遙看滄海月吞却碧霄雲漁
火隨星動潮音雜梵聞中冷如美釀未飲已先醺
步上金鰲背空濛海色分江流巴蜀水樓壓楚天雲過

櫓甯妨定驚濤了不聞

孫魴金山詩有過櫓妨僧定驚濤濺佛身之句却憐塵

世客無酒亦醺醺

陸漁笙太史七旬誕辰作此奉贈

人生七十古稀年況復蓬萊列上仙
吟鬢尙餘瓊島雪朝衣猶帶御爐煙
秦關百二曾持節弱水三千早繫船
欲學嬾殘煨芋贈肯將鐘鼎換林泉

還山別陸太史

殘年飛錫出深山欲看梅花也不閒
纔與高人同一飯仍歸疏雪細雲間

題章价人太守銅官感舊圖四首

并序

咸豐四年粵寇犯長沙時曾文正公以在籍侍郎墨經治軍銅官渚兵敗公憤極投水時价人爲幕賓力援得不死及金陵大功告成當時部卒皆得置身通顯獨价人浮沉牧令亦數奇矣論者謂文正將別有以報价人故非淺識所能知也价人感舊爲圖徵詩一時如左文襄李次青方伯諸公皆爲文以記其事云

銅官渚與汨羅鄰墨經從戎憶老臣若便將身葬魚腹豈能當代畫麒麟

湘水無情日夜東休將往事問漁翁書生何必臨前敵

此是中興第一功

患難相從不等閒

曾文正嘗謂李次青方伯云
儗人爲余患難友豈能忘耶

白頭無

語對青山翻思介子焚棉意不在區區竹帛間

岸芷汀蘭春復春江山如舊畫圖新先生亦是無情者
不許靈均有替人

題嚴小舫觀察春江意釣圖

甲辰

艷說嚴陵有遠孫雲臺已邈客星存披圖如見羊裘叟
猶覺桐江釣石溫

江上春潮沒釣磯谿花相對淡忘機不須更入桃源去
恐引秦人欲憶歸

家住慈湖湖上山青松碧柳映蒼顏磯頭宴坐誰能會
不犯清波意自閒

掌握絲綸任不輕一波纔動萬波生何如早濯滄浪足
放下魚竿卧月明

寄呈江督魏午莊宮保八截句并題其洞庭歸釣

圖

曾持一劍靜三邊白髮丹心老益堅東閣於今虛席待

文襄衣鉢要公傳

公生平去住如左文襄其治軍亦恍惚相似

坐鎮秦州百二關軍民相見各開顏祇今落日長城外

楊柳青青不忍攀

公督陝甘時所植楊柳今成林矣

老將王命入黔滇絕塞軍威尙凜然移節南洋資鎖鑰
不教鯨浪勢滔天

烟波漫釣洞庭春正值蛟龍戰鬥辰長願石尤阻歸棹
中流砥柱賴斯人

朱陵福地記曾登煨芋留殮媿老僧爲問江南庾開府
同遊應憶最高層

一自寒巖別使君白雲蒼狗變紛紛却憐滄海無窮事
祇隔青山便不聞

去年訪舊白門遊小住仍同甬水舟不敢蘿衣謁朱紱
閒情只合伴沙鷗

公勤王室我安禪廊廟山林各有緣望日開雲思舊事

此心還在祝融巔

王辰秋曾陪公登祝融峯觀日出

次韻酬嚴詩盦

太白峯頭屋數間高眠應羨老僧閒眼前滄海杯中水
頭上青天脚底山滅燭夜延松月朗閉門時拒野雲頑
祇嫌吟鬢蕭蕭白詩債經年尙未還

陳子言由申江以詩見寄次韻奉酬

蛟龍戰苦陣雲深黃浦猶聞白雪吟大地烟塵無淨土
空林猿鶴有哀音休誇返日金戈奮忍見橫波鐵艦沉
願與高人長論道萬重寒翠肯相尋

與嚴柅香先生茗話有作

白髮哀時叟清湘罷釣人
焚香常宴坐掃地却新塵
一任浮芳豔長存古柏真
雲山行脚倦喜與笑言親

余自四月還湘吳夢舟贈詩次韻奉酬

百城烟水一身還三載睽違鬢已斑
夢醒剡谿殘磬外詩寒台嶽片雲間
憐君好句清無敵笑我浮生老未閒
安得相携陵海嶠杖頭星斗手同攀

送王翊君之江南并柬李梅痴太史

一雨湘城風景閒送君去看秣陵山
臨川太史如相問

隔歲梅花債要還

太史曾許爲余作梅花手卷

將還天童別吳夢舟秀才

湘城傳夜管浩蕩起離愁欲載洞庭月歸隨滄海舟難
爲故人別況近楚江秋莫問水雲意含悽對野鷗

八指頭陀詩續集卷之四終

八指頭陀詩續集卷五

釋敬安寄禪

江南放棹

秋江好煙景如在畫中行
寒鷺沙際浴夕陽霞外明朝
連江總宅山近謝宣城何處
吹漁笛彌懷滄浪清

寄義甯公子陳伯嚴二首

俗子紛紛攄要津憐君寂寞卧松筠
流枯滄海哀時淚
祇作神洲袖手人

公子有憑欄一片風雲氣
來作神洲袖手人之句

何處烟霞息見聞匡廬山色淨塵氛
相期共結蓮花社
傳語青猿守白雲

附義甯公子次韻二首

碧湖花雨照迷津十五年前挾老筠

謂丙戌秋郭筠仙侍郎於

碧浪湖作展重陽會

石火光中吾未死乾坤毀後汝何人

縹緲潮音倚雁聞樓臺歌嘯隔霾氛虬鬚白足自來去想得袈裟生海雲

贈陳鶴柴居士二首

清逾野鶴瘦於柴混俗塵中有好懷滿耳笙歌花霧裏此心不異在雲崖

人間何處愜幽尋雲海相期盪此心萬仞巖前分片石坐收寒翠入清吟

贈吳彥復

一疏驚天効大璫不妨風雅更清狂
長揖歸來復何說滿懷秋思立殘陽

次夏穗卿見贈原韻一首

海波湧雪透襟涼慧命如絲幾欲亡
我法金湯猶有賴

袈裟和淚拜錢塘

時將往杭州開僧學堂君極贊成

遇周彥升於申江感賦

長沙一別十六載碧浪湖邊憶舊遊
黃浦江頭重相見西風寒葉不勝秋

訪李茹真於海國春酒樓

歲暮天涯訪舊遊
扶筇却上最高樓
白雲飛盡滄波晚
風雨蕭蕭海國秋

八月二十日與夏穗卿狄楚青黃益齋吳彥復陳
鶴柴小集滬濱酒樓

黃浦江邊百尺樓
海山當檻酒盈甌
一時良會豈易得
抵掌開襟話五洲

高樓廻首望中原
滿目河山破碎痕
塵世何方安樂國
誅求今亦到空門

時事須臾萬變更
浮雲應妬月孤明
維持像教賴公等
莫許波旬擾化城

楊哲子孝廉遠適日本作此奉寄

借問吾湘楊哲子一身去國歸何時故山猿鶴餘清怨
大海波濤動遠思獨抱沉憂向窮髮可堪時局似殘棋
秋風莫上田橫島落日中原涕淚垂

甲辰九月朔重過杭州松風定能海峯諸長老邀
余陪日本淨土宗伊藤賢道法師泛舟西湖感
而有作

西湖豈料吾重到彈指人間二十年白髮蒼顏身老矣
青山紅樹興蕭然喜陪南岳舊禪侶謂海公共結東瀛淨
土緣風景滿前吟不盡夕陽寒磬放歸船

贈夏大令

卓卓祁門令危言動腐儒
旣排原道論還薄晦庵書
有願護靈鷲無心喫冷豬
如公眞哲學門戶意全除

陳鹿笙方伯自蜀中罷官僑寓西湖甲辰秋晚遇
於滬瀆把臂道故輒成此詩

崎嶇蜀道古來難
七十八翁今復還
曾整衣冠服羣盜
公戡定蜀匪有衣冠鏖戰圖
不淹日月靖諸蠻
良弓高鳥俱休論
布襪青鞋好是閒
世事浮雲紛萬變
獨留老眼看湖山

贈狄楚青

仙骨森森淩紫虛
雲霞舒卷任何如
獨持海上風潮論

不上人間卿相書

示鬢因

曾與維摩結淨因
天衣猶認鬢陀新
莫吟柳絮驚人句
好向蓮花見佛身

秋晚還天童留別陳鶴柴

我愛詩人陳後山
連朝日暮並車還
黃花細雨澹詩意
寒葉西風黯別顏
儻許共吟千嶂月
相隨直入萬松關
天童去此無多路
祇在孤雲落照間

秋晚劉海臣太守偕友人入山適余有事之杭及
歸公已去讀其留題丈室詩悵然有感謹次其

原韻寄呈

勝侶良辰發興奇
名山猶自想風儀
何堪絕壑尋秋日
恰值孤雲出岫時
惆悵未陪林下語
歸來惟讀壁間詩
會須一問遺民訛
好訂蓮花結社期

暮秋閱報紙見義甯公子由金陵返豫章九江舟
中之作因憶曩與君陪郭筠仙侍郎於長沙碧
浪湖作展重陽會彈指十五年矣故人存歿之
感一時橫集次韻奉懷不知涕之何自也

此生豈分作詩囚
垂老江湖一葉舟
遙夜朗吟湓浦月
孤襟涼帶石城秋
題糕應憶碧湖社
載酒曾陪白髮遊

十五年前思舊事不禁淚濕海雲頭

閩人周居士殿樞自采石磯太白樓致書問訊以
詩代簡奉酬

采石磯邊太白樓勞君尺素遠相投山中老衲還高卧
江上名區可一遊經卷得閒須展讀風帆未滿却宜收
白雲蒼狗紛紛事肯與忘機狎海鷗

今秋八月廣東揭陽縣因奉 旨興辦學堂驅

逐僧尼勒提廟產時有老僧禿禪者年已八十
不堪地棍衙役之擾乃斷食七日作辭世偈八
首沐浴焚香誦護國仁王經畢卽合掌端座而

逝余哀之次其韻以紀一時法門之難

孤禪寂寞與時違黃葉蕭蕭落滿衣今日空門無地托
茫茫雲水欲何歸

人天掩袂淚流丹鐘鼓無情夜月寒世出世間皆有累
爲僧爲俗兩皆難

謗佛排僧口爍金不容地上有禪林慈悲忠恕原同理
猶感 純皇護教心

想忠恕念慈悲思感應三教同心此純廟難羣臣汰僧之語也

山河破碎夕陽餘一片傷心畫不如祇恐空門無處著
白頭和淚上官書

人非豺虎日磨牙公牘紛紛入省衙試問揭陽賢大令

老僧何罪要拖枷

佛亦哀時敢自寬中流誰爲挽狂瀾可憐慧命垂危急
一息能延賴長官

禪心對境本無妨昨見流亡哭一場若使窮黎俱得所
男誰爲盜女誰娼

爭人爭我枉焦唇割肉醫瘡任此身但願羣生登樂土
大千世界轉祥輪

爲饒石頑舍人女窈雲詩集題詞

舍人昔友我支許各自期笠屐相往來談笑情無疲其
女尙未字乃父授以詩過目卽成誦凝神恒若痴惟愛

親典墳轉羞塗粉脂得句倩弟寫把卷啟吾疑清才難
屢得雛鬟豈如斯深聞聞此言良久淚猶垂阿儂固不
敏彼禿亦何爲旣嫁作人婦仍下讀書帷吟唱益精進
鸞鳳歡追隨巾杖侍遠遊江山發藻思西湖蓮拂珮北
固翠橫眉雲霞方散綺蘭蕙初吐莢秋霜胡不仁瓊英
忽已萎黃絹遺芳咏青山埋玉姿謝娥甯足比班妹或
心儀借問織錦手應留繡佛絲降靈必瀛島稅駕合瑤
池感化理不昧懷貞信彌奇伊余忝父執爲爾一題詞

挽文芸閣學士三首

宣室猶聞訪逐臣可憐才大不謀身西江煙月空千頃

內翰文章第一人待漏苦吟 雙闕曉拂衣歸釣五湖
春秋風一夜瓊枝折落日孤雲亦愴神

十五年前碧浪湖展重陽會記還無侍郎白髮曾攜酒
野寺黃花共飯菰滬瀆停雲勞憶汝瀟湘落月渺愁吾
淒涼舊社幾人在支許神交老益孤
丙戌秋郭筠仙侍郎於長沙碧浪湖作展重陽會一時英耆俱集公與余均與斯會去年公在滬上作懷人詩尙齒及余

空巖木落氣蕭森感舊哀時益苦吟滄海難填精衛恨
白雲迴望故人心中年沉醉非關酒上國和戎欲鑄金
時美人請易金鑄爲款君到九泉應痛哭老禪猶自淚沾襟

再挽文學士五絕句

痛哭東林黨禍餘朝衣典盡尙收書平生亦病文園渴
不向長門獻子虛

一笑投簪返舊林蒼涼時事鬱孤襟可憐頭白匡山裡
誰諒孤臣去國心

曾入空王不二門文人慧業自長存諸天花雨紛紛落
獨有維摩默不言

人間何處可安禪劫火焚燒海欲然兜率天中猶有漏
好歸佛國證金蓮

廻觀三界事無窮都付浮漚一笑空坐斷死生來去路
青山原在白雲中

贈喻明州一首

並序

明郡四明山峯巒高峻巖洞幽巖實應真羽客
神棲之藪也山有石窻巍然特出重雲之表四
面明敞越中全境一覽無遺四明明州均以是
名惟地濱海溼風潮衝突林岫叢雜山賊海寇
時出沒其間古稱難治邇歲奸民設賭局名花
會引誘鄉愚男女宵征罷織荒農有司雖知其
害衙役鄉保於中分肥緝捕不力由是盜賊紛
起閭閻苦之庶三喻公以名翰林出守斯郡下
車伊始廉得其情密飭營弁緝獲渠魁數人寘

之於法此風頓息民賴以安咸稱賢太守不置
余美其善政爲五言古詩一章贈之

達人抱玄朗塵垢甯我撻出應黃屋求猶挺青松貞神
理足自貴圭組非公榮越州古仙都四明何崢嶸秋花
潤丹岩遙霞標赤城剖竹守斯郡甬水揚其清海波寒
自息刁斗夜不驚井邑有絃誦山塗無榛荆昔時豺虎
窟今聞樵牧聲伊余蔭宇下聊得襲芳馨孤襟賴以吐
微尙荷有成載歌甘棠詩慨然起深情

寄吳彥復

山中何事可相聞日夕閒情說與君擊鉢吟殘千嶂月

采芝纏滿一身雲
寒松瘦石清誰味
意蕊心香細自熏
却憶維摩居士室
鬢天花雨日紛紛

寄酬俞恪士觀察一首

并序

甲辰六月俞恪士觀察由金陵來甬偕喻湘平
孝廉羅侏子大令仇繩之茂才枉顧天童時余
已先期還湘待余山中七日題詩惘惘而去余
歸不及一晤讀其交空四海公垂老愁入深山
雨易成料得歸來應有淚不因禪寂便無情之
句不盡二十年故人之感秋夜耿耿離愁黯黯
泣然成七律一章用酬其意卽以奉寄

故人遠自白門來，潦倒中年亦可哀。
寂寂江山成獨往，茫茫身世付餘盃。
可堪一棹還湘去，徒使孤帆渡海回。
惟有青天好明月，照人兩地各徘徊。

再寄恪老二絕句

紫薇山上碧湖邊，往事依稀在目前。
一十七年如電掣，西風吹鬢各蒼然。

我自瀟湘打槳還，故人歸卧秣陵山。
孤禪寂寞誰相問，落葉殘陽獨掩關。

冬日偶作

忽見梅花發，思鄉又一年。
衡雲離岫直，海月抱天圓。
去

住初無意行藏似有緣滄桑看已慣是處可安禪

不寐

禪房鐘梵歇不寐聽猿吟幽興老難遣詩魔病益侵移
牀就明月得句抵黃金早識浮名妄其如此夜心

懷湘吟

久矣萬緣寂惟餘故國情衡崖飛翠冷湘水照人清賦
鵬憐賈誼懷沙弔屈平蒼梧遺舜廟松柏拱丹楹

洞庭諸水滙天地混茫茫大澤通雲夢高樓倚岳陽湘
娥餘淚竹楚客惜蘭芳萬古風騷地令人憶不忘

余近日養疴天童影未出山昨閱報紙禿黎狡詐

一節云余已航海詣東京皈依本願寺大谷派
矣不禁啞然一笑因爲四絕句寄滬上夏穗卿
吳彥復狄楚青陳鶴柴

忽忽潮音振耳聞空中樓閣但霾氛何曾掛席東瀛去
未出青山一片雲

老病龍鍾祇閉關西方佛國待余還金池一朵蓮花外

兜率無心沉海山

白樂天晚年奉佛願生兜率天見慈氏時有人覆舟至一山榜曰蓬萊見

樂天列名其上樂天聞之辭以偈云海山不是吾歸去歸卽須歸兜率天余則翹心安養餘非所願矣

萬物平觀理自齊渾忘南北與東西我身不有餘何事

一任人呼老禿黎

滬上高人不可招，青天碧海路迢迢。且將白社閒中咏，

寄入黃鑪醉裡謠。

彥復與穗卿酬唱有黃鑪前後謠故云

重過吉祥庵留宿歸舟感賦

古寺重來廿六年，青松紅樹尙依然。頭顱半白人垂老，

世事全非佛亦憐。山近馬鞍

山名

雲在牖，潮生蜃浦

地名水

平川。匆匆一宿便歸去，半夜鐘聲催客船。

吉祥庵阻雨又一絕句

行裝已發又留連，夜雨寒燈濕不然。一宿因緣猶未了，老僧重掃白雲眠。

文公達寄示其尊人芸閣學士己亥懷余七絕一

章有愴於懷因次其原韻二首追述舊游

碧浪湖邊攜手日漫天花雨演真乘前塵影事依稀在
腸斷雲山舊衲僧

淨名金粟前後世會得三乘祇一乘踏破鐵鞋徒自苦
輸君有髮亦如僧

學士有句云獨有淨名無一語天風吹座落花深

附文學士原作

雲山踏破萬千疊宗說遙通上下乘挂屨楓前感
今昔何緣得遇雁門僧

甲辰臘杪水賓笙茂才來山度歲以除夕書懷七
絕一首見示因次其韻四章贈之

遮莫年華似水流
碧紗長護好詩留
爐中煨芋從君啖
箇味能嘗焉用愁

門鎖青松映碧流
雲邊片石久相留
請君坐此聞仙梵
一洗人間萬古愁

萬壑寒松翠欲流
此中隨意可勾留
不宜拋却煙霞去
恐引梅花動別愁

巖洞幽深水曲流
於茲避世且淹留
春風二月桃千樹
省却漁郎別後愁

贈別洪啟唐茂才

乙巳

寂寞空山誰扣門
與君相見笑言溫
如何別我城中去

細草閒花欲斷魂

送許繼詢出山

依依七日山中住，忽忽送君松外歸。
料得還家應憶我，長空惟見白雲飛。

吳北山由日本還申作此奉寄

見說乘槎萬里行，勝遊知己徧東瀛。
掀天波浪供吟嘯，

出窟鯢鯨候送迎。花近高樓傷往事，

中東和議成於春帆樓有吳摯父題

傷心處三字於此樓云

雲歸絕巘愴餘情。遙憐黃浦江邊月，應爲

哀時黯不明。

乙巳秋劉子芙明府由蜀渡浙枉顧天童爲五律

二首贈之

蒼翠落東海此山高插空誰攜綠玉杖掛我碧玲瓏涼
步踏潭影薰衣坐桂風休尋出雲路鎖夢萬松中

錦江山水好勝覽却輸君試問峨眉雪何如太白雲流
泉供清賞煨芋許平分月下寒猿嘯應同巴峽聞

子芙明府小住山中十餘日行將出山再疊前韻

二首贈之

幽興頗不淺攀蘿俯碧空不辭山笑兀惟愛石玲瓏聽
竹眠秋雨移琴弄晚風且拋黃綬事老我白雲中

巖谷罕人事幽懷細語君苦吟常對月冷抱欲生雲苔

碧寒更好空青淡不分溪山如此美莫遣別離聞

中秋對月

明明一輪月湧出碧雲端風露秋都澹星河夜未闌光
浮蘭葉淨香動桂花寒坐覺諸天近無言還獨看

前詩未竟妙明之理復爲五言一首

寂寥此禪坐空階露華白心光耿相照但有指頭月太
空無片雲皎皎圓理澈坐久若有悟澹然離言說

又七絕一首

長庚山上蓋珠城萬里微雲淨太清一樣平時碧天月
照人無此十分明

日本滑川達澹如自上海寄詩見懷輒成七絕四

章答之卽約入山消夏

山中幽寂苦思君
煙外飛淙日夕聞
莫向人間苦炎熱
洗心來入萬峯雲

白藕香清暑氣微
綠陰晝靜客來稀
萬松密鎖雲間寺
六月寒生溪上衣

萬壑煙嵐絕點埃
寺門臨水映花開
松風夜半清難寐
猶待幽人踏月來

家住扶桑近日邊
主持清議筆如椽

君時爲同文
滬報主筆好攜

黃浦江頭月來試
白雲山上泉

再答澹如

大暑日流金聞君白雪吟如招松頂月同聽澗邊琴既
愜入林趣彌清出世心含情動微韻聊用答知音

聞陳師曾由日本返金陵再次前韻奉寄

見說東遊返白門江南黃葉已盈村遙知兵甲胸中滿

不放風濤筆底喧

君雖力崇新學議論極平

滄海愁生青鬢雪碧湖

冷浸白鷗魂

往在長沙與君父子開碧湖詩社酌唱甚樂

世情已逐浮雲變

神契惟應爾我存

陳師曾次韻見答再疊一首寄之

昨夢逢君白下門

夢與易實甫觀察訪君父子於金陵

高吟同坐夕陽村

直將蓬島煙霞氣一洗華堂燕雀喧文字語言無實義

楞嚴經云但有名言都無實義

東西南北有歸魂

實甫有東西南北四魂集

可憐八

載江湖別吃吃惟餘舌尙存

武陵陳伯濤作宰江南曾以其金陵門存唱酬韻

集見寄湘中時余往浙事繁遲遲未答閱四年

於天童禪課之餘追懷舊事補次其韻

一別仙源出洞門綠蘿閒殺武陵村鬚眉莫悵塵中老

雞犬猶聞澗底喧蒼狗白雲紛世態桃花流水黯歸魂

長沙舊事吾能記長恨歌殘曲本存

君往在長沙有次長恨歌原韻七古

一首一時傳

抄幾徧湖湘

太白山感事

欲舒老眼豁重昏
太白巍然海上尊
塵世滄桑看已慣
雲山寂寞道猶存
平沉大地復何事
粉碎虛空無一言
宗門悟道有粉碎虛空平沉大地之語
惟有哀時心
尙在白頭垂淚望中原

魏玉銘明府遣其妾玉蓮索詩作此應之

偶因乞食渡恒河
紅樹青山畫裡過
誰遣朝雲叅佛印
却緣天女識維摩
芙蓉出水禪心淨
貝葉吟風梵語和
四大本空無一物
散花休問意云何

輓屠雲孫明府

東林蓮社久追陪，忍醉淵明酒一杯。
五斗折腰非戀祿，三年泣血未忘哀。
君時丁太夫人憂未滿微霜豈意摧高柳，快雪何心見早梅。
太息故人今隔世，青山冷抱白雲來。

寒夜口占

萬重寒碧一燈昏，坐久疏林見月痕。
夜半虎嘯人在定，不知松雪壓巖門。

冬夜漫興二首

道人寒夜興悠然，自折松枝煮竹泉。
却向茅亭看鶴睡，旋移藤榻枕雲眠。

人間無夢到山家，睡醒爐烟一縷斜。
夜半溪聲疑是雨，

起看明月在梅花

月夜不寐

北斗橫天夜欲闌
梅花睡鶴冷相看
萬松不語風鈴歇
清磬一聲山月寒

答顧居士

高寒誰過老僧家
掃雪呼童自煮茶
寂寂茅齋萬山裏
坐看凍雀啄梅花

夜坐燈燄忽綠有影橫窗諦視不見

寺門蕭索鎖寒煙
夜靜誰參白骨禪
燈碧微窺山鬼影
想渠來就草堂眠

八指頭陀詩續集卷之五終

YONG UNIVERSITY

ASIAN STUDIES

